

Kontuola

ANTZUOLA / Egubakoitza / 2005eko apirilaren 8a / 238. zenbakia

KOORDINATZAILEA: Aintzane Irizar • Barrenkalea 33 BERGARA 20570 • Tel.: 943 76 03 97 • Faxa: 943 76 29 77 • Posta elektronikoa: kontuola@goiena.com • Lege gordailua: SS1179/02

Herriak parte hartzea eskatzeko, 543 sinadura


AINTZANE IRIZAR

Beheko Auzoko, Eguzki Auzoko eta Sagasti Auzoko bizilagunek 543 sinadura batu dituzte, *Denon artean erabakitze*ko lelopean. Martitzenean, hilak 5, aurkeztu zituzten sinadurok udaletxean eta Udalari eskatu diote batzar bat egitea arazoari irtenbidea emateko.

Udalak hainbat proiektu ditu eskuartean: Sagastiko zelaian Gizarte Etxea eta Kultura Etxea egitea eta Beheko eta Eguzki Auzoen artean 50 etxebizitza eraikitzea. Beheko, Eguzki eta Sagasti auzoetako bizilagun ugari eta hainbat herritar ez daude ados proiektuok; ezta proiektu horien gaineko erabakiak hartzeko eta arauak aldatzeko aurrera eraman den prozesuarekin ere.

Gauzak horrela, urtarrilean sinadurak batzeari ekin zioten; guztira, 543 sinadura batu dituzte. Oraingo astean, martitzenean, sinadura horiek guztiak udaletxean aurkeztu dituzte.

Sinadura horiekin bizilagunek zera eskatzen dute: Udalak eskuartean dituen proiektuen eta arau aldaketan prozesua bertan



Urtarrilean hasi ziren sinadurak batzen.

behera lagatzea eta horren gaineko eztabaida herrira zabaltzea. Era berean, arazoari adostutako irtenbidea topatzeko, batzar bat egitea eskatu diote Udalari.

Ekimenaren antolatzaileen esanetan, "horrelako proiektu garrantzitsuak aurrera eramateko herritarren iritzia kontuan hartu beharko lituzke Udalak".

ERRETIRATUAK


Batzorde berria osatu dute erretiratuek

AINTZANE IRIZAR

Aurreko zapatuan, apirilak 2, urteko batzar orokorra egin zuen Erretiratuaren Elkarteak. Aurreko urtearen erreposoa egin zuten eta aurtengo aurrez ikusten dituzten diru kontuen eta ekitaldien gaineko azalpenak eman zituzten.

Azkenik, batzordea berriro egin zuten. Batzordea osatzen zuten zortzi lagunetik lauk laga egin zuten euren kargua, eta lau kide berri aukeratu zituzten.

Honako hauek laga zuten batzordea: Jesus Agirrek, Juanita Zabalok, Asensio Azkaratek eta Mari Luz Arregik. Batzordean jarraitzen dutenak hauek dira: Salvador Olabarria, Karmele San Sebastian, Miren Aranguren eta Andoni Azkarate. Batzordekide berriak, azkenik, honako hauek: Migel Montori, Lourdes Arregi, Josefa Aiastui eta Antonio Jurado. Orain, batzordea osatzen dutenek, presidente berria aukeratu beharko dute.



Lau batzordekide berria aukeratu zituzten urteko batzar orokorrean.

HERRITARREN HITZA / Fernando Lete • Langilea

Alfonso Ugarte (1879-1937)

Oraingo delako egun batzuk herritar batek Alfonso Ugarte zenari buruz galdetu zidanean, konturatu nintzen gure artean ezezagun bat dela 1879an Antzuolan jaio zen musikari eta musikagile hau.


Federiko Ugarte eta Manuela Leturiaren semea zen; 23 urterekin, Lizarrara joan zen bizi izatera eta bertako Karmen Bikuña neskatxa gaztearekin ezkondu zen; hiru seme alaba izan zituzten: Maria Puy, Federiko eta Julio (apaiza).

Hamar urterekin hazi zituen kantu eta organo ikasketak Zumarragan eta Bergaran;

berehala, bere trebetasunez ohartu eta Sekundino Esnaola musikari ospetsuaren laguntza izan zuen lehen urrats haietan.

Ondoren, Donostiako kontserbatorioan goimailako piano eta armonia ikasketak egin zituen.

1902. urtean, oposizioak irabazi ondoren, San Pedro de la Rúa elizako organo jole postua eskuratu zuen eta Lizarrara abiatu zen.



"Garai hartan organo jole goraiatua zen Alfonso Ugarte"

1920an, Lizarrako Udalak Musika Bandaren zuzendari izendatu zuen.

Fededuna eta elizgizona zen Alfonso; ondorioz, konposatutako partitura gehienak elizarako eginak dira. Beharbada, gure artean, *Salbea* da bere obrarik ezagunena, baina obra ugari ditu eta konpositore izateaz gain, garai hartan organo jole goraiatua ere bazen antzuolarra.

Abertzalea izanik, egoera latzak jasan zituen; bere lagunaren artean, abertzale ezagunak zeuden: R.M. Azkue, Manuel Irujo Justizia Ministroa eta Fortunato Agirre Lizarrako Alkate Jeltzalea.

Julio bere semea, apaiza, Loiola gudari batailoiko kapilaua izan zen; Fortunato Agirre lagun mina frankistek fusilatu zutenean, atsekabeterik, bihotzekoak jota hil zen Alfonso Ugarte, 1937an, 57 urterekin.

Ikusten duzueenez, badago Alfonso Ugarte antzuolarraren historian zer ezagutu eta egin beharrik.

LABUR

Independentzia Egunerako txartelak salgai

Datorren asteko zapatuan, apirilak 16, ospatuko dute Independentzia Eguna. Antzuolako Gazte Asanbladak antolatuko du jaiegun hori, eta urteroko bezala, Udal Pilotalekuan izango da. Herri bazkaria izango da hantxe, eta dagoeneko salgai jarri dituzte bazkari horretarako txartelak; Mox. Larrea eta Surpe tabernetan daude salgai, 10 eurotan. Oraindik ez dute egitaraua guztiz zehaztu, baina, bazkariari zuzenean, hainbat ekitaldi antolatzen dihardute gazteek.

ELKARRIZKETA

OLATZ LEZETA/ARROLA MENDIZALE ELKARTEKO PRESIDENTE BERRIA

“Arrolaren egoera benetan kezkarria da; batzordea osatzeko arazo handiak izaten ditugu”

A.I.


Martxoan egin zuen urteko batzar orokorra Arrola mendizale elkarteak. Hantxe, besteak beste, batzorde berria osatu zuten; gero, elkarteko presidentea berria aukeratu dute, Olatz Lezeta, hain zuzen ere.

Arrolak duen lehenengo emakumezko presidentea izango zara, ezta?

Bai, hala da; dena dela, batzordean gauden kideetatik, erdiak gara emakumeak. Elkartean beti egon da emakume asko.

Orain dela aste batzuk KONTUOLAn argitaratu genuen zuen gutunean, Arrolaren gaur egungo egoera kezkarria dela esaten zenuten. Zein egoeratan dago, bada, elkarteak?

Egoera benetan kezkarria da, bai, gutunean esaten genuen moduan. Batzordea osatzeko arazoak izan ditugu azkeneko urteotan; ia datorren urterako jende gehiago animatzen den parte hartzera, bestela, erabaki desatseginak hartu beharko ditugu. Nik neuk bi



A.I.

urte daramatzat batzordean eta, berez, kargua bi urterako izaten da, baina jarraitu egin behar izan dut.

Irteeretako parte hartzea, baina, bestelakoa da; orokorrean,

jende askok parte hartzen du, gaztetxoek irteeretan, batez ere.

Antolatu ere, irteera ugari antolatzen dituzue umeendako eta gaztetxoendako. Zeu ere

“Aurten izango dugun berritasun bat da Aiherrara asteburu pasa joango garela”

umetatik hasi zinen Arrolaren irteeretara joaten?

Bai, beti joan izan naiz; beno, gaztetan, garai bat izan nuen mendizaletasuna alde batera laga nuen. Lehenago, gainera, ume denok joaten ginen irteeretara; gaur egun ere, lehen esan dudan moduan, umeak eta gaztetxoak dira finenak.

Aurrera begira, zeintzuk dira zuen erronkak?

Batzordean parte hartzeko jendea topatzea da gure lehenetasuna. Gainera, harremanak egiteko aukera egokia eskaintzen du. Bestalde, aurten izango dugun berritasun bat da aihertarrekin batera asteburu bateko irteera egingo dugula Aiherrara.

LABUR

Patxi Cabori omenaldia egingo diote zapatuan

Martxoaren 18an irten zen Patxi Cabo Martuteneko kartzelatik, eta egun hartan egin zioten lehenengo ongi-etoerria herrian. Bihar, zapatua, omenaldia egingo diote; 20:00etan poteoa egingo dute trikitalariekin, eta ondoren, 21:00etan, afaria egingo dute Udal Pilotalekuan. Afaloste-an, berriz, hainbat ekitaldi egingo da; besteak beste, musika talde bat eta bertso-lariak egingo dira.

Arrolak irteera egingo du Balerdi mendira, 17an

Arrola mendizale elkarteak Aralarreko Balerdi mendira irteera antolatu du, apirilaren 17rako, domeka. 08:30ean irteera dira Herriko Plazatik eta Amezketa aldera abiatuko dira. Handik gora ekingo diote ibilaldiari; lau orduko bidea egingo dute, joan-etorrian.

Izena emateko, martitzen, hilak 12, 19:00etatik 20:00etara, egingo da aukera, Arrolak Kalebarrenen duen lokalean.

HIRIGINTZA

Herrian 136.643 kilo birziklatu ziren 2004an

A.I.

Urtetik urtera gora egiten du birziklatzen diren hondakinen kopuruak. Debagoieneko Mankomunitateak emandako datuen arabera, 2004. urtean, guztira, 136.643 kilo hondakin birziklatu genituen antzuolarrak. Papera, kartoia, beira, ontziak eta arropak kontuan hartuta ateratako datua da honakoa. Ibarreko gaineko herriein alderatuta, datu positiboak dira Antzuolakoak.

Debagoieneko Mankomunitateak emandako datuen arabera, 2004. urtean, 64.520 kilo paper eta kartoi batu dituzte herriko edukiontzietan. Horrek esan nahi du biztanleko eta hileko 2,8 kilo paper eta kartoi birziklatu ditugula.

Beirari dagokionez, 52.004 kilo beira jaso zituzten Antzuolan; Biztanleko eta hileko 2,27 kilo eramane genituen edukiontzira.

Ontzien gaineko datuak ere eman dizkigute: guztira, 15.436 kilo ontzi jaso zituzten iaz; biztanleko eta hileko, 0,67 kilo.

Jarri duten azkeneko edukiontzia, berriz, arroparena izan da. Zerbitzu berria dela kontuan hartuta eta gainerakoak bezala egunero sortzen den hondakina ez dela kontuan hartuta, oso erantzun ona izan du zerbitzu honek; 2004. urtean, guztira, 4.683 kilo batu zituzten Antzuolan.

ZABORRA ETA OLIOA

Zaborrari dagokionez, Mankomunitateak ez du herriz herriko daturik ematen. Debagoienean, guztira, 17.782 tona zabor batu

zituzten iazko urte osoan zehar.

Azkenik, birziklatzeko batzen duten sukalden erabilitako oliorekin gainerako datuak ditugu. Antzuolan, guztira, 2.190 litro batu zituen horren ardura duen Ecogras enpresak. Litro horietatik 1.635 ostalaritzan batu zituzten; gainerako 555 litroak, berriz, etxeetan erabilitako olioak ziren.

Gogoratu behar dugu, hileko azkeneko egubakoitzean etortzen dela Puntu Berde Mugikorra Antzuolara; azokan jartzen dute, 09:00etatik 13:00etara.

KIROLA

PARTIDUAK

FUTBOLA

Apirilak 9

10:00: Antzuola-Bergara (Infantilak)

12:30: Antzuola-Almen (Neskak)

16:00: Antzuola-Lasarte (Erregionalak)

PILOTA

Apirilak 8

20:00: Olalde-Beloki II (Eskuz kad.)

Ondoren: Olalde-Aretxabaleta (Nag.)

EMAITZAK

FUTBOLA

Bergara 3 Antzuola 0 (Gazteak)

Antzuola 3 Bergara 0 (Kadeteak)

Urki 1 Antzuola 1 (Neskak)

LARREA
TABERNA
Kalebarren 17
ANTZUOLA

ANTZUOLA
Apainketak eta
isolamenduak
Pladurrezko dibisioak
Kalegoi 21 ANTZUOLA
676 997 400
Biltegia: 943 78 70 40

GAILUR
taberna eta
gozotegia
Buztinzuri 13 ANTZUOLA
Tel.: 943 78 70 32

